

**Najib Ucap Takziah Kepada Keluarga Bekas MB Kedah  
Bernama  
26 Sept, 2013**

KUALA LUMPUR, 26 Sept (Bernama) -- Datuk Seri Najib Tun Razak hari ini mengucapkan takziah kepada keluarga bekas Menteri Besar Kedah Tan Sri Azizan Abdul Razak yang meninggal dunia di Hospital Sultanah Bahiyah (HSB), Alor Setar pagi ini.

"Al-Fatihah. Takziah kepada keluarga Tan Sri Azizan Abdul Razak atas pemergian arwah, semoga roh beliau dicucuri rahmat," kata perdana menteri dalam laman Twitternya.

Azizan, 69, menghembus nafas terakhir di sisi keluarga di wad Unit Rawatan Rapi HSB.

Jenazah beliau dijangka dikebumikan di Muassasah Darul Ulum, Alor Setar pukul 5.30 petang.

Dalam laman Facebook beliau pula, Najib menyifatkan Allahyarham Azizan sebagai seorang pemimpin yang baik, mudah diajak berbicara dan menghormati pemimpin politik lain meskipun berlainan parti.

"Saya menerima berita kematian Tan Sri Azizan Abdul Razak hari ini dengan perasaan sedih. Bagi saya, Allahyarham adalah seorang pemimpin yang cenderung mengajak ke arah perpaduan sesama umat Islam agar menjadi lebih kuat.

"Allahyarham juga dilihat sebagai seorang pemimpin yang tidak suka kepada perseteruan politik yang berpanjangan atau perbezaan pendapat yang boleh merugikan umat," katanya.

Najib berkata pemergian Allahyarham juga merupakan satu kehilangan buat negara.

"Justeru, saya sekeluarga mendoakan agar rohnya diletakkan di kalangan orang-orang yang beriman dan dicucuri rahmat.

"Kepada keluarga Allahyarham, saya ingin mengucapkan takziah dan bersabar dengan ujian ini. Al-Fatihah," katanya.

-- BERNAMA

Copyright © 2013 BERNAMA

Source: <http://www.bernama.com/bernama/v7/bm/newsindex.php?id=980730>